



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 7

**Kejriwal-i maneni Delhi Chief minister
inyaka jail nungi yimsüsütsü**

**Pakistan nung kiralongraba
samatsütsü: PM Shehbaz Sharif**

VOL. XXI ISSUE NO. 160 (ADOK 160) DIMAPUR

KÜPTOKNÜ (SATURDAY)

METSÜREMI (MARCH) 23, 2024 ₹ 5.00

Manipur sorkari NPF candidate yaritsü akok

Imphal, March 22, 2024 (Agencies): Manipur nung Biren Singh-i aniba sorkari Outer Manipur Lok Sabha constituency nung NPF candidate yaritsü akok ta osang angazüker.

Centre sorkari Lok Sabha elections nung Manipur CM Biren Singh toktepdaktsünüa liasü saka pai ibaji memulung.

BJP-isa Inner Manipur Constituency atema tang teinyakdak MP Rajkumar Ranjan Singh mesüra MLA Rajkumar Imo Singh na rongnung ka shimtsü meranger

Ajisüaka, Outer Manipur menden atema BJP terata ka nung

lir aser Biren Singh-i aniba sorkari Naga People's Front (NPF) candidate yaritsü akok.

Lok Sabha elections atema Naga People's Front (NPF)-i II-Outer Manipur Parliamentary Constituency atema Kachui Timothy Zimik shimogo.

Zimik ya retired Indian Revenue Service (IRS) officer ka lir aser pai tang teinyakdak NPF MP Dr Lorho S Pfoze melenzüksü.

March 20, 2024 nü tongtipang senden ka amenba sülen NPF Central Working Committee-i Manipur asoshi candidate shimba osang metetdakja liasü.

Nagaland Police-i drugs shibelener tetsüti ka apu

Dimapur, March 22, 2024 (TYO): Nagaland sorkari "War Against Drugs" tenzüker inyaka arudang Nagaland Police-i Assam Police den yaritepa drugs shibelener tetsüti ka puogo.

Iba nisung ya Baharudin lir aser pai northeast nung drugs shibelener. Pa Assam kübok Sonitpur nung apu aser police-isa pa den yariteper nisung ana, ka Dimapur aser ka Imphal nung puogo.

Northeast nung Baharudin anema ken o aika benoka lir aser pa aputsü bushitepa aru. Pai state aika nung drug network tulu ka ketdangsüa aru aser sunflower,

ganja o tanga drugs shibelener nung shilem agi.

Baharudin-i tenüng aika amshi, phone numbers aika bensi aser tesem aika nung jenoka aruogo. Pai küm aika ozüng amertem dang nungi jenshia arur tatem nung pa puogo.

Nagaland Police-i nübortem dang drugs ayokertem aser shibelenerntem osang sangoktsütsü mepishia metetdaktsüogo.

Nagaland Police-isa Assam Police aser Manipur Police nung DGP temi anir züngsemtem dang yaritepba atema pelaba metetdaktsüogo.

Hayithung-i LS election atema tenüng agütsü



IND Candidate Hayithung Tungoe Lotha-i Returning Officer Sushil Kumar Patel IAS nem nomination paper agütsüba angur.

Kohima, March 22, 2024 (DIPR): Nagaland nung Lok Sabha Election atema Independent Candidate, Hayithung Tungoe Lotha-i nomination paper agütsüogo.

March 22, 2024 nü Hayithung-i Commissioner Nagaland & Returning Officer's Office Kohima nung pa tenüng agütsüogo.

Commissioner Nagaland & Returning Officer Sushil Kumar

Patel, IAS aser Additional Deputy Commissioner (Hq) & Assistant Returning Officer Benjamin Longkap nati Independent Candidate indang kulikaketem repranga liasü.

Nagaland State nung 18 buba Lok Sabha Election atema tenüng mezüng agütsürji IND candidate Hayithung lir. March 27, 2024 nikonngang 3:00 ako nung nomination papers agütsüba maparen tembangtsü.

NPCC-i "Nagaland Khrista Asoshi" yimyim nenshir



Mokokchung DCC lokti senden takok ngua tembanger külen NPCC tir aser Lok Sabha candidate, S. Spongmeren Jamir den Congress party lenirtem noksa nung angur.

Mokokchung, March 22, 2024 (TYO): "Nagaland Khrista Asoshi" ta tangatetba yur lokti balalai maparen ajak inyaksangshia arur aser asenok ama Khristan teimtiba aliba state ka nung tamanger samatsütsü merangba party ka nem vote agütsüra, asenok tamang jenjang koloni aotsü.

Iba o ya Nagaland Pradesh Congress Committee (NPCC) tir aser tang aruya aliba Lok Sabha election nung Nagaland nungi tokteptsü alisang Indian National Congress (INC) candidate, S. Spongmeren Jamir-i Hogulbarnü Sangtemla Community Hall nung osangbener den jembidang metetdaktsü.

NDPP candidate ya 'PDA' sorkari candidate lir aser PDA ya BJP-i aniba NDA nung alliance ka. Anungji, PDA candidate nung vote agütsüba BJP nem agütsüba den saku ta angatetsüla. BJP-i aniba NDA sorkari 'secularism' ya India temzüng nungi intoktsü

meranger aser ibaji intokra asenok tamanger aser kin tilatem koda masüba tiai aitsü, ta pai ashi.

Centre nung BJP-i aniba NDA sorkari küm ter tama yimsü asüandang, parnoki kin tilapur tamangba yimsütem talisa Khristan pur rishikangshibaji ulura aser asenoki ngua arudar. Par yimsüsüba mapang Citizen Amendment Act parliament nung benoka renemogo aser par miim nükjidong ajak ataloka arudar. Ano NDA sorkar arura kopi meli-i Uniform Civil Code (UCC)-jia mapa küma aotsü ana nung lir aser ibaji mapa kümra asenok tali majungtsü, ta paisa tekümdangtsü o ka lemsatop.

Linük tebu Mahatma Gandhi-i meimba Khristan ken "abide with me" ya India nunger benjong tulu "Independence Day" aser "Republic Day" amala nung wako atsüzdükdang aten saka Modi sorkar arur külen nungi iba ken ya joko metendaktsür, ta paisa shisem.

Nagaland nungbo Khristan pur rishikangshibaji kanga otia/ buluabo mangutsü südi saka

meilongi RSS maparen agi asen atepzüngi aittsü meranger. Tatishitsü agi, 25th December nü "Good Governance Day" amungba, Deobarnü vote azüngba aser ano maparen balala inyaksü merangba kuli lir, ta paisa shisem.

Anungji, asenok ama kin tilatem kümzüka alitsü asoshi "Secular Party Congress" nem vote ajentsütsü asoshi paisa nüburtem ayongzüka liasü.

Tanü Mokokchung district Congress Committee lokti senden nung taoba MLA aser PCC member, Toshiokba Longkumer, DCC president Watimongba Aier, DCC general secretary (admin) P. Aley, DCC vice president Lanusanen, DCC vice president Aojungshi, DCC Secretary Senti, DCC GS Aotemsu parnoki shilem balala agi aser Mokokchung district kübok tang aruya aliba Lok Sabha election atema constituency 10 nung election campaign asalentong yanglua liasü.

FGN-i 69 buba Nagaland Republic Day mongogo

Kohima, March 22, 2024 (TYO): Naga lima melemsadaktsütsü ta Federal Government of Nagaland (FGN) Kedahge, Gen. (retd.) Viyalie Metha-i nenshia metetdaktsüogo.

TPC Kohima nung Hokolbarnü 69 buba Nagaland Republic Day amongdang pai iba osang metetdaktsü.

"India-i tang tesüsuba inyakba mapa ya Nagaland tiyongtsü atsüngdang Naga lima lemsatsü aser tashimait kümdaktsütsü merangba mapa ka lir. Nagaland nung India aser Myanmar arrtsü mali. Anungji India sorkari inyaksüba shidangba ya temenüntsüka aser meimchir anema lir. Federal Government of Nagaland-i iba ya meinyakdaktsütsü" ta Gen. Metha-isa ashi.

"Tangatetba shitak aliba Naga senso ajaki Naga linük temetentem nung noktaksüla aser tsükchiri mapa tamajung inyakba noktangtsüla" ta Gen. Metha-isa ashi.

"Iba anogo nung asenoki tesüba asen otsüla-oboula nunger tasütait mapa inyakbatem

bilemtetdi. Parnoki asen linük kümzüka ayuba aser mapang shitak nung telemtetba shitak agiba aser iba senmang asenok nem yutsüba bilemtetdi" ta pai ashi.

"Tesüba nung asen lima tatalokbatem meyipa repringdi. Naga Lima tebu A.Z. Phizo-i alemli nungi yimsüng shia ya republic kaka lir aser pei pei council o assembly lir ta ashiba bilemtetdi" ta Gen, Metha-isa metetdaktsü.

1832 küm British nunger aruba ajanga Naga nunger tepela nung lia aruba nung timtem agütsü. Parnok den rarayonga aruba sülen 1879 küm parnok asen lima tesem kar nung lidaktsütsü atema tebang agi temelaba agütsü, ta pai ashi.

Kohima-i British Statutory Commission arudang Nagaland Naga nungeri British nungeri ashiba magizük aser 1929 nung Simon Commission nem memorandum ka agütsü.

"India nem nüjiso agütsüdag A.Z. Phizo-i anir Naga lenirtem India-i ao aser Linük Tebu Mahatma Gandhi aser tanga lenirtem den ajurutep. Naga nungeri Indian national leaders


dang tangatetba tejangja ashi aser August 14, 1947 nü nüjiso anguba sangoktsü. Iba sülen March 22, 1956 nü Parashen, Rengma Region nung FGN tentet" ta Gen. Metha-isa ashi.

"Nagaland atsünga agitsü aser alima tsüngdang tenüng meraksatsü atema India indang policy melenshi aser Nagaland agitsü atema sen amshi. Iba atema parnok kilir aser Naga nunger tazünger kar den 16 points Agreement agitep aser iba ajanga India nung Nagaland state kümtet" ta paisa ashi.

Naga National Council (NNC) aser FGN samatsütsü atema India-i Naga nunger kar prangpong aser sen tashi ajanga amshi. India-i Naga nunger teloktem den külemi Naga lenir aika tepset aser tanü tashi iba mapa inyaker, ta Gen. Metha-isa metetdaktsü.

Naga nungeri temenen mapatem nungi pilaa alitsüla aser Tsüngrem bushitsüla. Chichiba Khristantem ama asenok kati ka den mapa tajungtem inyaksüla aser asen lima nung linük anema inyakba mapa agientsüla, ta paisa ayongzüker.

Dimapur Government College nung World Water Day amung



Dimapur, Metsüremi/March 22 (TYO): Alima ajunga den külemi March 22, 2024 nü World Water Day nungtem nung Jal Shakti Team, Dimapur Government College ajanga "Water for Peace" omen nung ajemdaker walkathon sentong ka ayongzüka liasü.

Duncan Colony nung aliba

lenmang asem lenjem nung sentong tatsüka agiba mapang Lhipe Naro, Assistant Professor ajanga o tatsüka jembia iba walkathon flagged off sütsü.

Iba sülen Amongla Jamir, Assistant Professor ajanga sarasadem aser tzü wazüka ayutsü asoshi awareness walk

ya college campus nung tembanga liasü.

Maneni iba walkathon tembanga Dr. Rukuoviu, Assistant Professor lenisüba kübok sentong ka agia liasü, kong Dr. G. Phukato Sema, Assistant Professor aser convenor, Jal Shakti Team ajanga o tatsüka jembia liasü.

BJP-i Congress indang bank accounts salatsüla: NPCC

Dimapur, Metsüremi/March 22 (TYO): BJP-i aniba sorkari All India Congress Committee (AICC), Indian Youth Congress (IYC) aser National Students' Union of India (NSUI) indang bank accounts tem soita ayuba asoshi süngmanger, ta Nagaland Pradesh Congress Committee (NPCC) ajanga March 22, 2024 nü sangdong ka nung ashi.

India ya alima nung democracy tulutiba linük ka lir

asere BJP ajanga iba ama democratic yimya masüba mapa inyaka linük nung danga political party tem madak chubatsü merangba yagi democracy tepseter, ta Khriedi Theünuo, Working President, NPCC ajanga sangdong nung ashi.

Democracy indang benjong tulutiba tatongi Congress indang bank account tem soita ayuba ya lenla ajak nung Party inyakyim paralyze

kumdaktsütsü merangba maparen ka dang lir, ta ashi.

Iba yagi BJP aser par alliance temi yimya amshia tetsübo aser tenokdangba makai election nung takok mangutsü tsüboa bilemba temai adoka sayur.

Anungji Congress Party indang bank accounts tem tekeraba nung salatsü akhanger, ta NPCC sangdong ajangasa ashi.

DC Longleng ajanga Model Code of Conduct sangdongogo

Dimapur, Metsüremi/March 22 (TYO): Lok Sabha atema General Elections agitsü asoshi Election Commission of India (ECI) ajanga sangdongba ama aser iba election tesunep nung ochishia shidak agitetsü atema ECI ajanga guidelines agütsüba nung ajemdaker Section 144 CrPC, 1973 kübok tashi agüja alima amshia Longleng District nung nisung shingai prangbong mesüra injang mamshitsü tenokdangba agütsür, ta Deputy Commissioner & District Election Officer Longleng, Dharam Raj, IAS ajanga sangdong ka nung ashi.

License aliba prangbong ajak anasatiba police station nung yutsütsüla, ta ashi.

Maneni Longleng District nung Model Code of Conduct benoker aser election agiba mapang aser result sangdongba anogo tashi aonung 10:00 ako nung anepdang 6:00 ako tashi gari nung public address system mesüra loud speakers

mesüra sound amplifiers inoka mamshitsü mesüra election atema senden amenba nunga mamshitsü, ta ashi.

Elections dak sendakba rallies, lokti senden aser procession amaka inyakyim ajak Model Code of Conduct nung shia aliba ama inyaksüla aser ketdangsür nungi temelaba agir police station nem jelia osang agütsüba sülen agitsüla.

Nübuyimba mapang loud speakers aser gari amshitsü atema temelaba agitsüla, ta ashi. Election mapang political party mesüra candidate temi nübuyimba mesüra danga political mapa atema sorkar indang machinery, resources aser facilities amshitsü khenyongi memelar.

Sorkar indang ki o jen nung banner, poster, hoarding inokba, political symbols, political lenir indang noksa inokba aser jara nung züluba ajak ghonda 72 tsüngta indoktsüla, ta ashi.

Temelaba makai public property aser bus stands, lenmang, buses, electric/telephone poles, municipal/local bodies building amala public space nung temelaba makai zülusaba, poster inokba ajunga ghonda 48 tsüngta agientsüla.

Kasaji private properties nungia ghonda 72 tsüngta agientsüla.

Election maparen sunepa tembangtsü asoshi district tesem ajungalen law and order shidak amshitsüla aser aibelener nem tapet temerenshi agütsütsü.

Iba totuyuba ya police personnel, security forces, Law and order duty nung dena aliba ketdangsür aser personnel dak alaka Longleng District nung alir nisung ajunga asoshi lir.

Iba totuyuba ya tang nungi tenzüka amshitsü aser ECI ajanga results mesangdong tashi alitsü, ta DC Longleng ajangasa metetdaksü.

Dimapur nung mobile showroom nung inyaker ka dak kotari agi atsüng

Dimapur, Metsüremi/March 22 (TYO): Dimapur nung mobile showroom ka nung inyaker tetsür ka dak March 22, 2024 anungdang 11:30 ako meta lar medemer kati kotari agi atsüng.

Iba lendong ya Nyamo Lotha Road, Dimapur nung

aliba Realme Store ka nung ataloka liasü. Iba lendong nung yirur alila ya arishi küm 22 tain Deepali Mech ta jangjaogo aser la idangjisa Nikos Hospital bushia anir ao.

La dak iba ama mapa tamajung inyaksang ya lar

medemer Abdul Majid ta jangjaogo aser pa ya New Market, Dimapur nung dokan kibur ka lir ta ashir.

Iba tatalokba dak sendakba nung Women Police Station, Dimapur nung ken o ka benoka bushisüngdangba mapang lir.

NU Lumami Convocation sentong nung Nagaland Angh aden

Dimapur, Metsüremi/March 22 (TYO): Nagaland University, Lumami nung 6 buba Convocation sentong March 22, 2024 nü agidang Nagaland Angh La Ganesan dena liasü.

Pai iba sentong nung jembidang kaketshir temi bendanga agütsür tejangraba tulu nung meranga inyakba ajanga takok anguba asoshi tenüngdang agütsü.

Nisung kar government sector aser kar private sector nung mapa inyaka asen linük ainba aser terenlok nung yariteptsü aser kar bendang limai oa tali züngloka aintsü, ta Angh La Ganesan-i ashi.

Tali züngloksü mesüra mapa tasen ka tenzüksü ya jangratemtsüka lir, kong tayongzüka balala ajurutsü aser asen shisatsü tali renloka temelenshi asoshi maangka angur, anungji akok tashi angazüksüla aser alima nung tajungtiba rongnung ka-ka akumtsü merangtsüla, saka pei linüki meyipa shilanga nüburtemi timtem ajuruba angateta itemji kokteta tarutsü putu ajungmesotsüla, ta pai ashi.

Tesayur temi tajungtiba nung sayutetba atema pai tenüngsang agütsü aser pa kaketshir ka ama bilemer, kechiaser angazükba nung tatem maka, ta ashi.

Ato Kilonser Narendra Modi lenisüba kübok Government of India-i asen linük yangertsü asoshi kaket reju aser shisatsü tajung dak rangloker. Kaket rejutem ajungba aser kaketshir ajungba ajanga technology aser rongsenketzüng tsütsü India ya tim leni anir, anungji kaket reju temi sentong tasen apiteta lanurtem dang sayutsüla, ta Angh-i ashi.

National Education Policy 2020 ya multi-disciplinary kumdaktsüogo, aser maangka balala agütsür. Ato kilonser mangdang Vikshit Bharat @2047 (Developed India) asangsang akumtsü asoshi putu tasen ka asen jakdang lir aser iba atema sorkari bendanga agütsür inyaker, ta ashi.

Iba sentong nung Nagaland University nungi nisung 86 nem gold medal agüja liasü aser department balala nungi kaketshir 156 nem degree balala nung takok kuli agüja liasü.

Dr. Abemo, Registrar, Nagaland University ajanga iba sentong tenzüksü aser iba sülen Prof. Jagadish Kumar Patnaik, Vice Chancellor, Nagaland University ajanga University indang osang agüja liasü.

Iba sülen Dr. Samudra Gupta Kashyap Chancellor ajanga Conferment of Degrees agütsü.

18 Buba Ongpangkong Tetsür Mungdang kaogo



18 Buba Ongpangkong Tetsür Mungdang Inti Mungdangti sentong nung Straightway Christian Mission Centre Mokokchung indang Administrator, Dr. Temjenwala Pongen-i jembidang tangokba noksa ka yangi angur.

Mokokchung, March/Metsüremi 22 (TYO): Tanü Mokokchung Town Hall nung 18 Buba Ongpangkong Tetsür Mungdang Inti Mungdangti sentong "Rangben Terenlok Leni" ta asüba omen nung ajemdaker kaogo.

Mungdangti omen dak ajemdaker Straightway Christian Mission Centre Mokokchung nung Administrator, Dr. Temjenwala Pongen-i jembidang pei sasa pei ayak meteta libalirotsüla, shisaluyim tashi kanga junga angateta amshitsüla, ronsenketsüng aser shishilempaba ketdangsütsü shisatsü alitsüla aser ochishir takum asütsüla ta asüba tsütsülen nungi mungdangsanger tesentepertem ayongzü.


Tanü iba mungdangti amungba nungtem nung pangzüng asem renem aser item pangzüngtemji Mokokchung town nung Ongpangkong Tetsür Mungdang ki akaba kilem tongpanga tajungtiba nung renemshitsü, tanabuba nung

Ongpangkongtsürtemi adianu tsükong pungo tetsürtem den tesendaktep tajung nung longjema alitsü aser tasembuba nung OTM mendent-i achaayanga Mokokchung town nung Honibar Bazar amentsü.

Tanü iba mungdang nung nungtet luden ajanga 19 Buba Ongpangkong Tetsür Mungdang anitsü asoshi tir Asangtila (Aliba), tatong tir Bendangrenla (Khensa) tongti zülur Pangimenla (Chungtia), tongti zülur yarila Sentinungla Longkumer (Mokokchung Yim), sen zülur Tajentila (Longkhum), sen zülur yarila Nungsangmongla (Ungma) aser kimen Zülukala (Longsa) shima liasü.

Maneni sanen luden nung Rongsenlemla (Aliba), Intikümla (Chubayimkum), Kilangnaro (Chungtia), Maongnungla (Chuchuyimpang), Sashichila (Khensa), Bendangrenla (Kinunger), Watilemla (Küpza) aser Temsüinla (Longjongkong) alitsü.

PM Narendra Modi-i anogo ananü atema Bhutan semdang



March 22, 2024 nü Bhutan nung aliba Paro International Airport nung Bhutan Ato kilonser, Tshering Tobgay-i Ato kilonser, Narendra Modi agizükdang tangokba noksa nung angur.

New Delhi, Metsüremi/ March 22 (Agencies): Ato kilonser Narendra Modi-i anogo ananü Bhutan semdangtsü atema Hokolbarnü Bhutan-i ogo; India nung 'Neighbourhood First Policy' mapatong kübok pai Bhutan semdang.

Bhutan nung pai Bhutan Ato kilonser, Tshering Tobgay den senden amentsü.

Modi-i March 21-22 anogotem nung Bhutan semdangtsü liasü saka

tsüingsang-mopung majungba agi anogo ka atsülanga liasü.

Hokolbarnü Modi-i X ajanga, "Bhutan-i aoer, kong ni India-Bhutan tesendaktep tajungba akümtsü atema sentong aika nung adentsü. Ni Bhutan Chuba, His Majesty the Fourth Druk Gyalpo aser Ato kilonser Tshering Tobgay ajurutsü," ta metetdaksü.

Taküm February ita nung Tobgay Ato kilonser akümba sülen pai mezüng India

semdanga liasü.

Iba jakdang Bhutan Chuba, Jigme Khesar Namgyel Wangchuk-ia yaküm November ita nung India semdanga Assam, New Delhi aser Maharashtra state tem sema senzü.

Iba mapang nungji Bhutan Chuba aser Modi nati linük ana tsüingda tesendaktep onüktem nung o lemtepa den külemi regional aser international onüktem nung o lemtepa liasü.

Sorkar tasen tentetba sülen India-UK tsüingda FTA tezüngzüktep agitsü

New Delhi, March 22 (Agencies): India nung Lok Sabha election agia sorkar tasenba tentetba sülen ang India aser UK na tsüingda free trade agreement (FTA) tezüngzüktep agitsü, ta ketdangsertem osang ka ajanga metetdaksü.

Sorkar ketdangser kati, "Shishilembaba dak sendakba tezüngzüktep atema legal inyakyim reprangshidar. Iba dak sendakba maparen renemyonga election tembanga sorkar tasen metentet tashibo tezüngzüktepji sangdongtsü makok," ta metetdaksü.

India aser United Kingdom na tsüingda FTA tezüngzüktep agitsü atema senden tatembangbuba tan ita menogo, ajisüaka linük anaprongla nungi teams-i maneni video conferencing ajanga tongtibang onük kar lemteptsü.

India aser UK nati 2022 küm January ita nung free-trade agreement (FTA) atema jemb

tenzüka liasü aser tang tashi nung senden 14 ben menogo.

March 12, 2024 nü phone ajanga jembidang Ato kilonser Narendra Modi aser UK Ato kilonser, Rishi Sunak nati FTA tezüngzüktep tekeraba nung tembangtsü atema jembia liasü.

Lenir anatisa linük ana tsüingda Comprehensive Strategic Partnership ano tajungba akümtsü atema jembia liasü.

Tesülen Modi-i X ajanga, "Ato kilonser Rishi Sunak den sensaksemogo. Künati Comprehensive Strategic Partnership tajungba akümtsü atema jembia den külemi linük anaprongla tajangzük angutsü atema tekeraba nung Free Trade Agreement agitsü bangjema liasü," ta metetdaksü.

Linük anatisa Finance Ministry ajanga bilateral investment treaty (BIT) tezüngzüktep agitsü atema ken o jembia tenzüko.

Kejriwal-i maneni Delhi Chief minister inyaka jail nungi yimsüsütsü



March 22, 2023 nü New Delhi nung Delhi Minister aser AAP lenir Atishi-i osangbenertem den jembidang tangokba noksa nung angur.

Ano külen Centre-i agütsüba tashi amshia Delhi Lieutenant Governor (LG)-i linük temzüng nung Arlla 239AA kübok President's Rule atema benoktsüa akok.

Hokolbarnü Arvind Kejriwal, Rouse Avenue court matsüingdangi anir ao.

Kejriwal apuba anema Hokolbarnü AAP lenirtem aser party nung inyaktermi longkak aitba mapang nung Delhi Ministers- Atishi aser Saurabh Bharadwaj na apu.

Atishi-i X ajanga, "Income Tax Office kima tesünep nung longkak aitba mapang nung Delhi Police-i ni puogo. Item nisungtem yagi mezüng tiyazü ken o nung Delhi CM apu aser tesünep nung longkak aitertem-a apur. Iba ya democracy tepsetba mesüra kechi ta ajatsü?" ta ashi.

Kejriwal apuba anema AAP-i March 25 nü Holi benjung mamongtsü, ta metetdaksü.

Delhi Minister Gopal Rai-i, "Taküm Holi benjung mamongtsü. March 25 nü onoki nüburttem dangi oa linük nung tatalokbatem metetdaksütsü.

Delhi CM Arvind Kejriwal apuba anema longkak aita March 26 nü Delhi nüburttemi Ato kilonser ki longbangtsü," ta metetdaksü.

Aam Aadmi Party (AAP) tongti, Arvind Kejriwal ya tamalen 'India Against Corruption' movement nung lenir ka liasü saka pai yimtenren nung ajemokba sülen Delhi Chief Minister kümsük (term) tasembuba inyaker.

Taruba Lok Sabha election atema opposition INDIA nung densema aliba AAP aser Congress nati Delhi, Haryana aser Gujarat state tem nung menden lemsar tokteptsü lia ED-i pa puogo.

Haiti nungi India sensotem kümzüksü atema 'Operation Indravati' tenzük

New Delhi, March 22 (Agencies): Rara adoka aliba Haiti nungi India nung sensotem kümzüksü atema India-i 'Operation Indravati' tenzüko, ta External Affairs Minister, S Jaishankar-i-i social media ajanga metetdaksü.

Haiti nung prangpong amer telok balalai timtem agüja rara tenzüko aser sorkar mali amai kümogo, ta ketdangsertemi metetdaksü.

'Operation Indravati' dak sendakba nung Brihostibarnü India nung 12 bo kümzükogo.

Hokolbarnü Jaishankar-i X ajanga, "India-i sensotem Haiti nungi aniteta Dominican Republic-i anir aotsü atema Operation Indravati tenzüka India nung 12 anitetogo.

Bendanglen asen sensotem kümzüksü aser ajungtsü atema onoki inyaksü. Dominican

Republic sorkari nungita yariba atema parnok dang pelar," ta metetdaksü.

March 15 nü osangbenertem den jembidang Ministry of External Affairs otongdar, Randhir Jaiswal-ia India sorkari Operation Indravati tenzüksü, ta metetdakja liasü.

"Haiti nung tensa mejungi kümogo. Nüngdakra onoki sensotem anitettsü. Parnok anitettsü atema onok renema lir. Nüngdakra onoki ibaji inyaksü," ta pai metetdakja liasü.

Haiti nung rara adokba sülen US-ia parnok indang embassy nungi menüngdakba staff tem tayimtsü ajanga anir ogo aser iba linük nungji emergency sangdonga lir.

Haiti nung prangpong amer teloktemi airports, police stations aser jail tem amakba sülen March 12 nü Ato kilonser

Ariel Henry-i menden nungi anenogo.

Tang Haiti nung tashi tulutiba alisangji Jimmy Cherizier kümogo. Arrshi küm 47, Jimmy ya taoba mapang police officer ka liasü aser tang 'G9 and Family' telok nung pa tongti lir.

Jail nung puoka alir meyirjang aika jenshiogo, nübür meyirjang aikati pei ki toktsür ajentsüsa aküm aser nisung aika linük telung nung jenshia lir.

Joko Haiti yimtiba nung shilem 80 bo prangpong amer teloktem kübok lir, aser tanüngba shilem 20 nungji teraradak lir, ta UN-i metetdaksü.

Haiti nung India sensotem den tongtepratepa yariteptsü atema control room ka amenokba den külemi emergency number ka lemsatepogo.



Delhi excise policy ken o dak sendakba nung Enforcement Directorate (ED)-i Delhi Chief Minister, Arvind Kejriwal apuba anema March 22, 2024 nü New Delhi nung Income Tax Office kima AAP lenirtem aser Delhi Ministers- Atishi aser Saurabh Bharadwaj na den AAP nung inyaktermi longkak aidang tangokba noksa nung angur.

New Delhi, March 22 (Agencies): Delhi excise policy ken o dak sendakba nung Brihostibar aonung Enforcement Directorate (ED)-i Delhi Chief Minister Arvind Kejriwal apuba sülen AAP lenirtemi, Kejriwal-i jail nungi Delhi yimsüsütsü, ta metetdaksüogo.

2021-22 kümsük nung Delhi nung benokba excise policy nung ochimashi liasü, ta tai tonglokja tamalen AAP lenir ana- Manish Sisodia aser Sanjay Singh nabo pua liasü.

Delhi Minister Atishi aser Assembly Speaker, Ram Niwas Goyal nati, jail nungia Kejriwal-i maneni Delhi Chief Minister inyaksü, ta metetdaksü.

Representation of the People Act, 1951 özüng kübok, court-i aitsü nung ang züngsem nungi anentsütsü akok, ajisüaka tang tashi nungbo Kejriwal nem tai tongloktsüba dak alaka pa aija mali, anungji pa anema tai tonglokja aliyonga pai maneni chief minister inyaksü akok.

Ozüng tsütsülen nungibo Kejriwal maneni Chief Minister inyaksü melatsüa akok, ajisüaka jail nungi yimsüsüba nungji tetsükdaksü aika ajurutsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 23, 2024

Yimjung asoshi tzü

Yashi March 22 anogo ya alima tzü anogo liasü. Bilemdangra, alima anogotem monga aruba rongnung ibaisa tongtibangtiba ta asenoki shitetsü, kechiyong asenok komaka akayonga aser shiametetyonga alima nung tzü tajemtsü makara taküm melitetsü. Atangji, khen bilemstübo alima nung tzü agi anungtsübaji tamamangtsüka lir, kechiyong alima nung ya ali dang nungibo tzü shilem noklang nung 71 ben agi tuluba ser atsüngdena lir. Ajisüaka, asenok asoshi tebilemstüji, alima nung aliba tzüji noklang nung shilem 3 dang nisungtem asoshi amshitetsüsa lir aser tanungba tzü 97% jibo tzüim tzü lir. Iba tzüim tzüjibo metsü agi tajem majung, anungji nisungtem asoshi chiyongtsü nung amshitsüla masü. Iba jagi tanü alima nung kin o kin na tsüngda, akhidang amato masü, ali masü tzü rakteper, anungji tarutsü alima rara yabo ali raktepba tongpang rara masü tzü raktepba tongpang asütsüa akok. Iba shisabolu aser tangatetba nung taküm 2024 küm Alima Tzü Anogo omen ya Yimjung asoshi Tzü renlokdahtsütsü nükjidong nung shimteta lir. Tzü tajemtsü raktepba agi alima nung kin o kin na tsüngda tongpang rara metenzükdangyongi, atangji, asen lima nung asenok rongnungbo tenzükogo. Joko, asen lima nungbo tenemlena aser lenden lena tzü rusepa aoba agi asenok timatemala asenoki ajangshir. Akhi mapang arem tawa alidangbo tzüpu nung tzü merusep, anungji tzüpu nung tzü raktepa raratepba otsü mangashi. Aji oda, tzü atatsü atema amuia moi nükenbelemtsü nungdak mali asü aser tzü alia ajemtsübo pongmang nunga mepongman. Ajisüaka, tanübo tzü mechi asenok kiyonger o kiyonger na aser yimer o yimer na rarateper. Atangji, akhi mapangji ali telong aser tema nung tzü talubo liasü aser nisungtem nungdak nunga tzü kanga mamshi aser meindok. Iba denji tanü putu nung asenoki tzü amshiba mapatem ya medemdangra, noklangben agi talila endoker aser tzüpokdakbo maliba - maliba küma samar. Akhidangbo asenoki tanü shidokshira aser merükmeju dang tzü endokba ama meindok aser kidang narok aser atsü nung tzü agütsütsü nungdak mali asü. Aji oda, tzübo kanga tali endoker aser tzü apokdakbo mali akümer ta asüba agi, akhidang lenden lima feet noklangka shi tzü ongken tua irr tzü anguba tesemtem nung tangbo feet noklang pezü pungo tua iaka tzü mangur. Iba jagi tanü asüngbo tesem aika nung ali perepa irr tzü atsüteta ajemba mapatem nokdang aser akok tashi asenoki mobile recharge ser amshiba ama tzü recharge asütsü ajangshir. Iba tzü recharge asüba yabo light amshia inyakttsüba mapa ka masü saka asenoki ali tua yur yangji asenoki endokba tzü tamajung aser talisa tzünglu arudang tzünglu tzüji ali telonglenji yimokdaksür. Iba jagi ali telonglenji mekongdaksüi tayi alir. Asenoki tzü ya angati talubosa anguba oset ka amai bilema mashimashi amshir. Ibaji asenok aikati tzü agi timmedemdang aser manüngdang asüba agi asütsüa akok, ajisüaka kodang asen alidak tzü kongadokdir ayongtem kongadoktsü, süngdonglidong azülatsü aser alu meyimettsü, anungji ayawara arutsü aser kodang ayawara arudir alima nung tesünep aser yimjung malitsü. Item timtem lendong ajakji alima nung tzü tajemtsü manguba nungi adokbatem asütsü. Iba timtem aser lendong jagi asenok menepa marudang, asenoki asen alidak tzü merusepdaksüi teimba küma poktetdaksütsüsa inyakttsübaji asenok ajak mapa lir. Atangji, arem tuluba aser temelemma kümdaktsütsü, tzü meyaka amshitsü aser tzü recharge asütsüba mapatemji asenok ajaki inyaktetba mapa lir, anungji asenoki tanü nungi inyakti. Alima nung tzü tajemtsü merusepdaksüi terenlokang renloktsüsa inyaktba mapaji tangar asoshi masü saka asen taküm yimjung nung junga alitsü asoshi lir.

OLEMSABANG

Temoatsü dang meshiba sarasadem

P. Renthly Jamir.

Tanü tongtibangsa arogo loktitem yagi alima dang parnok tamakok teraksa aibelenba aser tesama anguba indangbo mesayunür saka parnoksa tajungba tai mali takokba tajangzük indangang sangtonger . They are inclined to show to the world more of their success than their set backs more of their gain than their losses.

Asen Naga nunger Aor tamangertemi Temoatsü dang meshia sarasadem teraksa yanglushitsü yirua aliba anüptsü indangbo sarasadem mesünür. Iba kuli kar yangi lemsatepnür tamasaba nung benjongbentsü longsolepba aser mapa meranga inyaktba nung temoatsü meshiba . Asen tsurabur taküm ajak alu dak dang metaloker lia aru. Kechiyong nisung ka nungdakba ajak alu nungi züsenteta chi nungi tenzük aonsotsü süngotsü ajak süngjanglijang züngi, menti alu nungi aluba agi Alu ta ajar. Anungji alu atema yamala amungtsü mung munga aru Süngkomeshi, ii. Alurungmung, iii.Metsü walok, iv.Tentenmung, v.Talenmeshi, vi.Moatsümung, vii.Motemmung, viii.Longpensemung, ix.Chitenmung, x. Tsüngremmung Item yimkong amungba dak alema ano kija kibong alu waloki aoba aika lir.Oda mersüjang ateni aotsü mersü atemi aotsüa kibong anemponga aru.

Tang item amung paika alu atema amungba nungi Aortemi ana dang agiteta amunger aji moatsümung Tsüngremmung kazüa shi den chiyunga amungtsü ana shimtet.Iba ya kechi atema amunger tasüra Menüshishi asoshi benjongji yanglur aser yi agi takümji peladaksür aser ajak asoshi sen lalur Sayu-10-19. Naga nunger Aor dak azü nung aliba yimya pi temeteter German tawai aor Naga nunger dak parnoki ajitetba yamai ashi ta ashir.Item Naga nunger yabo mapa tajungtembo angazüktsü mejangrar saka teraksatsü mapatembo yakta angazük yinjang bomb mapok entoka akaba shia arur kurepdanger anütetsü kusar tenarong nung kürü anor cigarette Beri bongsang raktepa shia achir yamaji asen Aor aluyimer tsurabur aluyima aruba mapabo ajak toktsü alubo shingaia machir alu koda inyaka chiyungtsü ajibo mangazük moatsü Tsüngremmung benjongbo jungjanga mungteter saka ya tetezü makaba nung nübu aser rongsen entoker ta bilemdi. Kechiyong moatsü aser Tsüngremmung ya alu nung tsük metsü rema yur, alu inyakteta yur Tsüngrem dang temoatsü meshizüka amungba benjong lir. Saka shingaia alu mayim nung kodsür moatsü Tsüngremmung amungtsü aji tetezü maka Alu inyakteta maka nung temoatsüji koba atema moajang ta benjong Chiyunga amungtsü Tsüngrem danga aaktsüba-ato. tamalen NNO party government mapang Agri departementi aluyimer nem tzülu aser tzü mesüa aruba atema sen teyari agüja aluyimertemi tekonglu yima tzülu yima tsük peria züsenteta chiyunga aru.

Tang NNDP BJP ruling mapang Agri departementi süpokrem sen crore ana meshia agiba aser Agri dept. additional Secretary Jitendra Gupta sen Lakh 71.50 bener lia apu joko parnok Office CBI[9:01 pm, 19/03/2024] Hny: teloki 08-02-2024 nung tema telung ajak kaka meitba osang kaket nung nguogo yamaji aluyimer sen auyaba nung nübur shingaia yabo tim masü ta ola atoker mali kechiyong aluyimer mali süra moatsü aser Tsüngremmung nung temoatsü tulu meshizüka sarasademtsü pastor tuluba jaokbaji koda sarasademtsü. Alubo yima makaji Agri dept nung auürtemji moajang ta sarasademtsü asü. Kechiyong benjong ana yabo alu atema temoatsü meshiba benjong dang lir mesüra ozü nüburtemi mapa meinyak yonga moatsü aser Tsüngremmungbo metsüngareta amungtsüji onok chiyungtsü kotak nungi manna tsükdakjang ta shia nai metet onok ne chir azümesenertem ta ayimtenttsü asü ozü lima nung meinyaki chiyungnür tali rendakjang ta sarasademtsü . Iba dak alema Pastor atema sarasademtsü tanga onükbo aika mali ama bilemer. Tangar temeteter England America lima nung akhidang nungi ken mejemer sangro zülurtemi aluyimer takümji ochishir tepela taküm England chuba danga tepelaba ta zülu Asenok Aor ken mejemertemia onok tanur asü dang aluyimer takümji jangratemtsü ta tsüngküm mongpu balala yangyangtem ola Longmi, Loyang ongnak temenungratsüka enokasa aten.

Ochishir luyimer taküm tepiyong nung Takok angutsü merangaYamaji lipok nungi tenzük Taso lima-i nüchi aginür Aji aluyimer ken.

Tanü lanur ken mejemertemi aluyimerji tetsü jashia okrongseter ta mejema atenba angashir sangro zülur aser jilushi airtemia aluyimer timtumbatesa sayur. Alu shingaia mayimer nung Radio nung yamaisa atener.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gaza nung Khristantemi pei taküm taliba bendanga agütsür



Gaza nung aliba Holy Family Tenla kidang Khristantem tekülem sentong nung adendang tangokba noksa nung angur.

March 22, 2024: Yaküm October ita nung Israel aser Hamas na tsüngda rara tenzüka sülen nungi Gaza nung Khristantem kanga timtemdar, ajisüaka Gaza nunger Khristantemi pei tamang jenjang manokshir aser Khrista nem pei taküm taliba bendanga agütsür, ta Gaza nung inyakba Khristan charity teloktemi metetdaksü.

Aid to the Church in Need (ACN)-i, "Chiyungtsü tera agizüksü atema nisungtemi meta talanglang jajatsüsa akümer, ajisüaka chiyungtsü bakos (box) ka nung aliba chiyungtsü jagi nisung asem-a meperir," ta metetdaksü.

"Iba ama tensa ka nung anogo shia chiyungtsü tera dang süaka lemsatepa achibaji Khristantem atema maitsü

tasen ka kumogo," ta ACN-i metetdaksü.

ACN indang UK office-i West Bank aser East Jerusalem nung aliba timtemertem dang yariteter, kechiyong ozüing ajanga Gaza-i senotsü yoktsü memelar.

Tang ACN-i tanga organisations den yaritepa Gaza nunger Khristantem nem nisung shia hopta nung chiyungtsü anaben agütsür aser Khristan shia nem anogo ana shia loaf kaka agütsür.

Charity teloktemi tzü tajung magütetsütba atema sasar, kechiyong tzü tamajung amshiba ajanga tashidak proker, ta parnok metetdaksü.

ACN-i, "Tanurtem wara agi shiranga saaktsür aser tebok aoer. Ano kanga teintet sensotema kasaji shiranger aser

karbo hospital nung amongtsü nungdak, ajisüaka tangbo hospital nung treatment agitsüji tamakoktsü," ta metetdaksü.

"Iba ama tensa liaka Tsüngrem taochi jungkai adoker aser Gaza nunger Khristantem tsüngda kati ka anepaluteper. Tanur 120 aser teintet senso 84 densema Khristan 500 shi Holy Family Parish Tenla kidang jenoka lir. Putir ka den sisters teneti parnok anepaludar," ta ACN-i metetdaksü.

Khristan kati, "Tsüngrem taochi ajanga ozü chirnurtem tamang jenjang taoba mapang dang nungi tang tajungba kumogo. Iba ya Easter balaka asütsü. Kangki nung metaba asen Kümtedakba Kibur den onok tesendaktep tang tajungba kumogo," ta metetdaksü.

ANO GO ABEN TSÜNGREM DEN

Teti Taküm

"Tsüngrem Chir tenüing nung amangba nenok teti tatem maka taküm kar aji nenoki metettsü asoshi nenok dangi ni item züluogo." I Yohan 5: 13.

Tekümtet temoatsütem rong nung tazüingbaji takümji lir. Khrista akabaji taküm akaba, kechiaser takümji techir dak lir. Kibuba Yisu asüba aser tasü nungi shia aruba ajanga iba takümji agütsür.

Teti takümji Tsüngrem temoatsü lir. Adam nungi tenzüker teti takümji nungdaka arur. Adami temenen mena aser tasüba angu. Adam temenen ajanga temang nung tasüba agi atong. Tanela tasüabajia Adam temenen ajanga aru. Adam Eden tsüki nungi aridok. Tsüngrem aser nisung pila aser Tsüngremi Adam menen nembangtsü atema temelener agüja mesüdaksü asübo, Adami teti asoshi tasüba ngur lila.

Teti takümji tetenzük aser tatembang maka. Aseni amangba mapang nungi iba taküm agizüker, kechiaser Khrista asenok taküm dangi arur. Asenok tasü nungi Tsüngrem dangi aor. Asenok kodang temenen nungi tatok angur ibaji teti taküm alitsü tenzüka lir. Asenok temenen nung tasü liasü, saka Tsüngremi Par jabaso sempet agütsüba ajanga taküm kümdaksü.

Lenmang ana nungi teti taküm akaba jangjashitsü akok. Mezüingbuba, Pa o nung nangzüka ama Tsüngrem tenangzüka nung mulung lemteta lir. Tanabuba, kija taküm aliba yimya aser mapa ajanga. Na taküm lir ma ?

Oba, Ne Chir kü nem taküm agütsüba asoshi Ne tenüing asanger.

India nung state 28 nungi 19 nungbo Khristantem anema inyaker: UCF

March 22, 2024: India kübok state teimbaka nung Khristantem anema inyaker, aser taruba ita nungi Lok Sabha election agitsü lia Khristantem anema inyakba bulua akümer, ta New Delhi nung amenoka aliba United Christian Fellowship (UCF)-i metetdaksü.

March 21 nü UCF-i sangdong ka ajanga, "India nung state 28 nungi state 19 nungbo Khristantem anema inyaker," ta metetdaksü.

"Taküm küm tenzüker March 15 tashi nung India nung Khristantemi tangartem Khristan yimsü dangi meyipdaksür, ta tiyazü nung tai tonglokja Khristan 122 puogo. Kasa mapang nungjisa Khristantemi (UCF indang) helpline numbers ajanga Khristantem anema inyakba tatalokba 161 metetdaksü," ta UCF-i metetdaksü.

"January ita nung Khristantem anema inyakba tatalokba 70 liasü, February ita nung tatalokba 62 aser March ita nung anogo 15 tsüngda Khristantem anema inyakba tatalokba 29 liasü," ta parnokisa metetdaksü.

Ita asem shi Lok Sabha election atema nüboyimba sülen April 19 nungi tenzüka election agitsü aser June 4 nü election agiba osang sangdongtsü.

Ato kilonser Narendra Modi-i aniba BJP-i 2014 aser 2019 kumtem nung agiba Lok Sabha election nung takok ngua liasü aser maneni kümsük tasembuba sorkar akümtsü nükjidong yur parnok metetdaksü.

"2014 küm Modi sorkar akümba mapang nung Khristantem anema inyakba tatalokba 147 liasü. 2023 küm nungbo Khristantem anema inyakba tatalokba 687 tashi liasü," ta Arogo lenir kati metetdaksü.

UCF National Coordinator, A. C. Michael-i, "Linük nung Khristantem atema tebilemtsü tuluka kumogo," ta metetdaksü.

Tang India kübok state 11 nung anti conversion ozüingtem benoka lir aser item state teimbaka BJP-i yimsüsüba state tem lir. Hindu teloktemi iba ozüing tim mesüi amshia Khristantem nem tai toonglokja apur, ta Khristan lenirtemi

jembir.

March 21 nü osangbener den jembidang Michael-i, "Sorkari nütsüing teimba aliba nütsüingtem mejashidaksütsü tangatetba nung inyakba ajanga nütsüing ajema aliba tamangertembo tetsübu nung alir," ta ashi.

Kerala Catholic Bishops Council (KCBC) nung otongdar, Jacob G Palakkappilly-i, linük nung Khristantem atema kodamasüba tensa ka aruogo, ta ashi.

Paisa state sorkartem dang ozüing alema inyakerem anema inyaksü mepishi.

Tang tesüsabuba UCF report ajanga ashiba agi, India nung Khristantem atema state tamajungtibaji Chhattisgarh kumogo.

Taküm küm tenzüker March 15 anogo tashi nung Chhattisgarh nung Khristantem anema inyakba tatalokba 47 lir; iba state nung Khristantem loktiliba nungi sendoker, yimdak tzübo nungi tzü metadaksür aser Khristantem tasü mang leper nung aremtsü memelar, ta UCF report ajangasa metetdaksü.

Tanabuba jenjang nung, India nung nütsüing teimba aliba Uttar Pradesh lir, iba state nunga March 15 tashi nung Khristantem anema inyakba tatalokba 36 lir, ta kasa report ajanga metetdaksü.

UCF-isa, Uttar Pradesh nung taküm anti-conversion ozüing kübok tatalokba 30 nung Khristantem aika puogo, ta metetdaksü.

Taküm Madhya Pradesh nunga Khristantem anema inyakba tatalokba 14 lir, Haryana nung Khristantem anema inyakba tatalokba 10 aser Rajasthan nung Khristantem anema inyakba tatalokba 9 lir; item state ponguprongla nung BJP sorkar lir, ta UCF-i metetdaksü.

Taküm India nung Khristantem anema inyakba tatalokba teimba aliba state anaji Chhattisgarh aser Uttar Pradesh na lir; iba dak alia India nung Khristantem anema inyakba tatalokba aliba state tem rongnung Madhya Pradesh, Haryana, Rajasthan, Jharkhand, Karnataka, Punjab, Andhra Pradesh, Gujarat, Bihar, Tamil Nadu, Telangana, Odisha, Delhi, Goa, Himachal

Pradesh, Maharashtra aser West Bengal state tem densema lir.

"2024 küm tenzüker mezüingbuba anogo 75 tsüngda Khristan 122 apu mesüra tepuokdak lir," ta UCF-i metetdaksü.

A C Michael-i, linük nung Khristan lenirtemi item tatalokbatem anema ola adoktsü nungdaka kumogo, ta metetdaksü.

Paisa, "Asenok- linük nung Khristan lenirtemi tasü itta ola malirtem atema ola adoktsütsüla," ta metetdaksü.

UCF-isa linük nung yimtenren lenirtem dang ozüing alema inyakerem anema inyaksü aser election tesü nep nung junga agitettsü atema inyakdaksüner, ta mepishi.

Michael-i, "Tamangba yimsü meyipdaksü, ta tiyazü nung tai tongloksüba anema onoki ochi temeden asoshi menokdaktet tashi onok kodanga tesü nep nung melitettsü," ta ashi.

Nütsüing billion 1.4 aliba India linük nung nütsüing shilem 2.3 dang Khristantem lir saka Hindu nungertembo nütsüing shilem 80 dak tema lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Sübang

- (v) temalen aser temeküt ajaklen ki yanglu (set up roof and wall)
- * Kiyir benjong atema onoki moapu tuluka sübang.

Sübok

- (n) abena aliba sü telonglen (under shawl or blanket)
- * Ojalai la sübok nung tanurtem ajak anitet.

OLONG PAITEP # 6735

	1	2						3	
4									
5								6	
7								8	
9	10				11			12	13
14				15					
	16								

TIPIEN

- 1. Ajem-ajemer - 9
- 5. Kanga tapet - 7
- 6. Ozü ka tenüng - 3
- 7. Tzünglu nungi kümzüker - 6
- 8. Anüng nungi tsüker - 3
- 9. Anüng shiruru - 3
- 11. Lenmang ajurutepdak - 6
- 14. Anüngdang tesangwa - 3
- 15. Tekong merang - 7
- 16. Tiyazü jembia tangar ashioktsür - 9

LANGTSÜNGLEN

- 2. An-i akor - 5
- 3. Tashi aketba chiyungtsü - 5
- 4. Kecha menungnangi - 4
- 10. Küm asem tarensen - 5
- 12. Nisung yimyatsüya - 5
- 13. Mali / mait - 4

OLONG PAITEP # 6734 TELANGZÜBA

TIPIEN:

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN:

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

**NAI-A YA METETTER MA
GUINNESS WORLD RECORD TASEN**



USA nungi Andrew Basso-i Guinness World Record tasen ka yanglutetogo aser ibaji tzü telong nung teka aser tetsür alenetba nung mapang tekaratiba nung salatetba lir. Iba otsü yanglutsü atema Andrew Basso teka nung handcuffs enok aser tetsüng aleneta ayu. Pai tzü telong nung minute 2 ser second 11 nung iba nungi salateta temai adok.

Andrew Basso ya escapologist aser illusionist ka lir aser küm 10 tashi pai iba wadang nung shilem agia arudang Sydney Opera House, Australia, West End, London, Broadway, New York aser Pantages, Hollywood ama nungtugu tesemtem nung shilem agia aruogo.

Manipur nung Congress senotsü agi timtemer: MPCC president



Imphal, March 22, 2024 (Agencies): BJP-i aniba sorkari Income Tax Department nem bank account sota yudaktsüogo ta opposition Congress-i tai tongloksür.

Election aser tanga nüngdaktem nung amshitsü atema party züngsemtem, members of parliaments aser members of Legislative assemblies-i tenla agütsüba sen sota ayur ta parnoki ashi.

Iba osang ya Hokolbarnü Congress Bhavan, Imphal nung Manipur Pradesh Congress Committee (MPCC) president Keisham Meghachandra-i ashi.

"Taruba elections nung onok senotsü agi kanga timtemtsü. Onok tetsüng aser teka alenbangogo" ta Meghachandra-i ashi.

INC bank accounts nunga Rs. 285 crore jungnüa sota lir ta pai ashi.

Bank branches 11 nung Congress party accounts lapoka

lir saka item ajak nungi sen magizükteter, ta Meghachandra-i metetdaktsü.

Assessment Year 2018-19 nung late returns filing masüba atema penalty ama Income Tax department nem Rs. 115 crore agütsüogo saka bank account sota lir. Taruba election nung BJP-i dang ketdangsütsü ta Meghachandra-isa ashi. Pa ya Wangkhem assembly constituency nungi MLA lir.

Manipur nung Lok Sabha menden ana lir aser shilem ana lemsar April 19 o April 26 anogotem polling asütsü.

"BJP sorkari democracy ajemshir saka Prime Minister Modi-ibo India ya alima nung democracy tetsü (mother) ta ashir" ta taoba Manipur chief minister aser opposition leader Okram Ibobi Singh-ia ashi.

IT department-i Congress party dangi notices ana yok, ka FY 2017-18 aser ka FY 1993-

94 atema liasü aser iba ya Congress timtemdaktsütsü atema lir ta Ibobi Singh-isa ashi.

INDIA Bloc-i Manipur nung candidates shimogo

Manipur nung political party 10 teloktep INDIA Bloc ajanga Hokolbarnü Lok Sabha menden ana atema candidate shimba osang metetdaktsüogo.

Manipur nung menden anaji- Outer Manipur Parliamentary Constituency (reserved for scheduled tribes) aser Inner Manipur Parliamentary Constituency lir.

INDIA Bloc candidate anaji Manipur Pradesh Congress Committee (MPCC) lennirtem dang lir. Ka Ukhrul assembly constituency nungi taoba MLA Alfred Kan-Ngam Arthur aser ka School of Social Sciences, Jawaharlal Nehru University (JNU) nung taoba associate professor Dr. A Bimol Akoijam na lir.

Alfred Kan-Ngam Arthur ya MPCC Vice president lir aser pai Outer Manipur Lok Sabha seat (ST) nung aser Dr. A Bimol Akoijam-i Inner Manipur PC nung tokteptsü.

Iba sentong nung INC (MPCC), AAP, AIFB, AITC, CPI, CPI(M), JD(U), NCP, RSP, aser SS (UBT) teshimtet nübotem aden.

Arvind Kejriwal apuba anema lungkak aitertem police-i apu

Dibrugarh, March 22, 2024 (Agencies): Assam police-i Hokolbarnü Aam Aadmi Party (AAP) züngsem aika apu.

Parnok rongnung AAP lennir aser Dibrugarh Lok Sabha constituency candidate Manoj Dhanowar aser AAP Assam president Bhaben Choudhary na dena liasü.

AAP züngsemtemi

Dibrugarh district nung local Bharatiya Janata Party (BJP) office kima lungkak aitba atema police-i apu.

Enforcement Directorate (ED)-i Delhi chief minister Arvind Kejriwal apuba anema AAP züngsemtemi lungkak ait.

"Kejriwal apuba ya tiyazü ken o ka atema lir aser iba ya political tasa ka atonga inyakba

lir" ta AAP Northeast in-charge Rajesh Sharma-i ashi.

"Kodaser Chief Minister ka kuli kecha melii apusü?" ta AAP Assam state president Dr. Bhaben Choudhary-i asüngdang.

Dibrugarh district kübok BJP office kima nung lungkak aitertemi placards aser AAP flag amshia liasü.

NPP candidate Ampareen Lyngdoh-i nomination süogo



Shillong, March 22, 2024 (Agencies): National People's Party (NPP) candidate Dr. Ampareen Lyngdoh-i Shillong Lok Sabha Constituency atema nomination süogo.

Iba osang ya Meghalaya Chief Minister Conrad Sangma-i metetdaktsü.

"Dr. Lyngdoh ya NPP aser Meghalaya nunger atema kanga

tongtipang lir. Iba ajanga asenoki tetsür tashi aser tetsürtem akhümtsüsuba sayur aser Meghalaya nungeri Dr. Lyngdoh pusemstü ayongzüker" ta Chief Minister Conrad Sangma-i ashi.

"Iba election ya National People's Party (NPP) aser Meghalaya nunger asoshi kanga tongtipang lir. Asenoki

asen tashi aser tetsürtem tushiba sayutsüla" ta paisa ashi.

"Asenok longjemer linük dang Meghalaya nungeri tetsür tashi dak tamang akaba sayutsüla. Parnoki asenok len anitsü aser Lok Sabha nung State atema ola adoktsü. La moatsür" ta Conrad Sangma-isa metetdaktsü.

Russia-i amakba sülen Ukraine tesem aika nung power mali

Kyiv, Metsüremi/March 22 (Agencies): Russia-i energy infrastructure nung tenük yoker missiles khaloktsüba sülen Ukraine nung tesem tuluka nung power mali kumogo.

Kharkiv yimti nung 15 ben bomb pokloktsüba osang lir, ta iba yimti indang mayor-i ashi aser Odesa nung kilen 53,000 dak tema nung power mali timtemtar.

Russia-i linük indang energy system nung teraksa agütsüsü meranger, ta Ukraine indang energy minister German Galushchenko-i aitsü.

Zaporizhzhia nuclear plant nem agütsüba power line ka raksaogo, ta pai ashi.

Regional governor Ivan Fedorov-ia power station teraksar dang liasü aser region nung ki tenet aoyi kumtsüogo

asir 35 raksatsüogo ta ashi. Aonung tepiyong aser anepdang tashinung Russia-i missiles 90 dak tema aser tapoktsü aliba drones 60 shi Ukraine telungi yoka liasü, ta Ukraine Tir Volodymyr Zelensky-i ashi.

Nisung ana asüba aser 14 yiruba osang lir.

Russian sepaitemi Ukraine yimtiba Kyiv nung tayimtsü amshia kanga sashia amakba sülen anogo ka lir Brehostibar aonunga maneni amak. Ki o jen raksaba nung tanur ka densema nisung 17 yiruba osang lir.

Tang tesüsa amakba mechi Tir Zelensky-i asendenshir anüolen tembar linüktem dang mitkar teyari aser air defence systems tali meshia liasü.

Par sepaitem injang bomb agi anüingba ya Europe asoshi

mezüngmeshi lir ta pai ashi.

Ukraine indang state hydropower company kati ashiba agi, Russia nungeri amakdang par indang tzünokdang tulutiba, DniproHES, Zaporizhzhia nunga kongshi.

Video footage nunga iba tzünokdang nung mi jangrua aliba nguogo, saka iba tzünokdang raksatsüsa lendong timtembo mali amai ajitet.

Tir Zelensky'er Kryvyu Rih jila nung aser Vinnytsia nung bomb pokloktsüba osang lir.

Brehostibar aonung Ukraine north-east tsütsü Kharkiv nunga amak.

Missile agi amakba sülen yimti nung electricity mali, ta Governor Oleg Synehubov-i pa indang Telegram channel nung ashi.

Küm 25 süiaka mamatetba Ojala

1999 - 2024



Asür. Jepdakyangla Longchatsür (Yimjenkimong) 23.03.1999 - 23.03.2024

Pongmang ka ama nai onok ajungbena toktsür or tanü küm 25 tashi rentetaka, Nü temeim ajemalu jakla aser tesüngjem menürem tejak onok molungjang nungi kodanga mepilar aser menungra-a alir. Na onok den meliaka ne sayubentsü, ajak den yimjung nung alitsü, taremzüc shisatsü, aser tepandang meli-e temeim mapa inyaksü nai inyaka toktsüba temoatsütem tanü tashi onok agir.

Na teti asoshi anisüngzükdak Kibuba den tepela nung Kodak nung lir ta onok temolung anisüngzüka nai renema toktsür aoba kidang sentepa ne menungraseta asen Teyanglur Tsüngrem nem tenüngsang aguja-a amonger.

- Temeim Jabaso-Jalatem, Semchirtem aser Kinungertem.



OFFICE OF THE WAROMUNGTSUR TELONGJEM KOHIMA

TENÜNGSANG AGÜTSÜR

Miss Ajungla Longchar, Lt.Lima Longchar aser Mrs.Temsüpokla na jalai NPSC ajanga agiba tatidang nung Nagaland government kübok Agriculture department nung Inspector mapa tajung anguba takok atema Waromungtsür Telongjem Kohima-i la nem tenüngsang tetushi agütsür.

La sempet tajung agi nübortem tenzüka wadang nung maneni takok ngua inyaka aotsüsa Tsüngremi moajangma.

Sd/- TEMJENMONGLA Chairperson WTK

Sd/- IMNATOLA Secretary WTK

Pakistan nung kiralongraba samatsütsü: PM Shehbaz Sharif

Islamabad, Metsüremi/March 22 (Agencies): Dera Ismail Khan nung takum bendanga agütsür amakba mapang sepai ana tepsetba sülen Ato Kilonser Shehbaz Sharif-i linük nung kiralongraba samatsütsü temulungtetba nung manokshi lir ta Hokulbarnü ashi.

Brehostibarnü Dera Ismail Khan nung Hathala police station kübok Tank Road nung suicide bomber kati military convoy ka amakdang sepai ana asü. Iba lendong nung sepai 22 shi yiru, ta police-i ashir.

Police ajanga ashiba agi, convoy ya Dera Ismail Khan nungi Tank-i aodang suicide bomber kati gari nung tapok oset bener arua convoy nung atsük aser iba mapang sepai ana asü aser 22 yirua liasü.

Inter-Service Public Relations (ISPR) ajanga Hokulbarnep sangdong ka agütsüba nung, suicide bomber mena aliba gari kati Dera Ismail Khan district nung aliba security forces indang convoy

nung tsüka apok, ta shia liasü. "Iba lendong nung linük indang tasü tait jabaso ana, Naib Subedar Yasir Shakeel aser Sepoy Tahir Naveed, linük asoshi takum bendanga agütsü," ta ashi.

"Pakistan indang security forces temi kiralongraba tebilemstü samatsütsü temulungtetba nung lir aser asen tasü tait sepai temi takum bendanga agütsüba ajanga asen temulungtetba tali akangshir. Talisa iba ama tasü mait mapa inyaker nem obendang agütsütsü," ta ISPR ajanga ashi.

PM Shehbaz-ia sangdong ka nung Pakistan Army ajanga kiralongraba temenen samatsütsü temulungtetba nung lir ta ashi. Linük nungi iba tebilemstü mesamatsü tashi kiralongraba anema rara manentsü, ta ato kilonseri ashi.

Army convoy nung kiralongrar temi amakba pai sashi-sashia aitsü aser mangyimer kibong den asükhu lemsatapa liasü.

Chairman Bilawal Bhutto

Zardari-ia iba lendong aija liasü. Paia sangdong ka nung, tasümai mapa ajanga security forces dak tenük yok, ta ashi.

PPP lenir Sherry Rehman-ia kiralongrar anema linük ajunga lungjema lir aser linük indang security forces dak tamang akar, ta ashi.

Pakistan nung kiralongra mapa tali akumer, talisa November 2022 nung nokdanga aliba Tehreek-i-Taliban Pakistan ajanga sorkar den ceasefire yanglua aliba tembangba sülen Khyber Pakhtunkhwa aser Balochistan province tem nung tali ataloker.

Bodhbarnü Gwadar Port Authority Colony nung sepai ana tepset aser Pakistan Army-ia kiralongrar nisung ti tepseta liasü.

Centre for Research and Security Studies ajanga annual security report agütsüba nung, 2023 küm linük nung kiralongrar temi amakba aser kiralongrar anema raraba 789 nungi nisung 1,524 asü aser 1,463 yiru, ta shia lir.

Uganda Tir Museveni-i par jabaso army chief kumtsü

Kampala, Metsüremi/March 22 (Agencies): Uganda Tir Yoweri Museveni-i par jabaso army tekolakba jenjangi aniketogo, anungji par tanur tambosang ya tir atema renemshitsü alitsü südi ta bilemer.

Ministry of Defence and Veteran Affairs ajanga Brehostibarnü menur sangdong ka nung General Muhoozi Kainerugaba ya chief of defence forces shim ta shia liasü.

Iba mera agiba yong par jabaso arishi küm 49 tain yagi pa melen tir inyaksü renemshir ta bilemer. Kainerugaba-i taoba küm X nung pa 2026 election nung tir atema tokteptsü tebilemba lir ta shia

liasü, saka tangbo iba post ya delete süogo.

Tawa tir indang jabaso ya linük tesem balala nung sentong balala ayongzüka jaja arur aser army tanishir kati partisan politics nung shilem agitsü nokdanga aliba ozüng ka nung aibeler. Ajisüaka Kainerugaba-i activist telok Patriotic League of Uganda tenzüka densema pa maparen ya nonpartisan lir ta ashir.

Arishi küm 79 tain Museveni-i tashiyim amshia 1986 küm yimten tashi rakzük aser iba sülen pa trokben tir shimtet. Tang sorkar kumteta aliba National Resistance Movement party telungzük nung pa den tokteper mali.

Kainerugaba ya 1990s

tatemlen army nung aden aser kanga kera temaba jenjangi ajungketa arur.

Ajisüaka Uganda nung iba ken o jembirtem anema sorkari mera tesashi agia liasü.

2013 küm Museveni-i pa melentsü Kainerugaba renemshitsür ta senior general kati tai tongloktsüba confidential memo ka temai adoktsüba sülen police temi osangkaket ana aser radio station ana anogo ter atema shibangja liasü.

Mitkar tanishir ka asünung Kainerugaba yagi yimjak nung yimtenren indang jembitsü memelar, saka pai mapang shia mangatettep adoktsüsa jembishinüba ajanga Uganda tekolok atsüker.

Afghanistan nung nisung asem pokset

Kandahar, Metsüremi/March 22 (Agencies): Afghanistan kübok Kandahar yimti nung bank ka jakdang takum bendanga agütsür bomb pokloktsüba lendong nung nisung asem asü aser 12 yiru, ta yangji aliba police aser ketdangsür temi ashi.

Brehostibarnü iba lendong agütsüba atema ISIL (ISIS) teloki par indang Telegram channel nung tenüng agia liasü.

Kandahar yimti tiyonglen New Kabul Bank kima nisung telok ka atatepan aliba nung tenük yoker bomb ya anepdang 8:00 ako meta poklokja liasü.

Yangji aliba police aser Taliban ketdangsür temia yangji nisung asem asü aser 12 yiru ta ashi. Ajisüaka iba yimti nung aliba mozüki ka nungi asür kanga timba lir ta ashi.

"Tanep iba lendong atalokba nungi Mirwais Hospital nung nisung tasü mang 20 agizükogo," ta nisung kati pa tenüng miimshia osangbener dang ashi.

Bank nung kanga mazüngi nüburtem pei itasen agizükba mapang iba lendong ya atalok, ta Kandahar province indang director of information and culture Inamullah Samangani-i ashi.

"Yimya agi nüburtem pei itasen agizüksü asoshi iba tesem nung adenshir. Asürtem ya civilian tem liasü," ta pai ashi.

Asürtem rongnung tanur ti tebu arishi küm 40 shi tain Khalil Ahmad ya itasen agizüki bank yagi ao, ta par kinunger kati Brehostibar nikongdang asüpila sentong nung ashi.

"Pa ya tongmelang nisung ka

liasü, pa ya painter ama inyaka liasü. Taoba sorkar mapanga iba ama lendong ya ataloka liasü aser tanga ataloker," ta Mohammad Shafiq Saraaj-i ashi.

"Asen linük nung aser talisang nisungtem aliba tesem nung security tim agütsütsü ajungshir, aser iba amala lendong nungi asen linük kumzüka ayutsüla."

Bomb apokba sülen Taliban ketdangsürtemi bank kima mükabanga osangbener tema meyok.

Afghanistan nung yimti tulutiba jenjang tanabuba nung aliba Kandahar yimti nungya Taliban lenir Hibatullah Akhundzada alir.

2021 küm August ita United States-i yariba sorkar nungi Taliban-i tashi rakzükba sülen Afghanistan nung bomb pokloktsüba aser takum bendanga agütsür azüdokshiba kanga ajema kumogo.

Ajisüaka ISIL indang regional chapter densema telungpur telok aikati timtem agütsür.

March 11 nü Muslim nunger temeshi ita Ramadan tenzüka sülen Afghanistan nung bomb lendong kar ataloka lir, saka Taliban ketdangsür temi ishika dang jangjatsü.

US Charge d'Affaires for Afghanistan, Karen Decker-i kiralongra mapa ajak aitsü aser asür kinungertem den asükhu lemsatapa liasü.

"Afghan nungertem tesunep nung aser tetsübo makai Ramadan amungtsüla," ta lai X nung ashi.

3rd North East Games: Medal tally nung Manipur temaba lir



Dimapur, Metsüremi/March 22 (TYO): 3rd North East Games 2024 tenzüker anogo pezü buba, March 22, 2024 nü asaya balala jangratema asayateta liasü aser medal tally nung Manipur temaba jenjang tongtet.

Tang tashinung Manipur-i Gold 32, Silver 22 aser Bronze medals 24 (ajak senteper medals 78) nguteta lir.

Medal tally nung Manipur temaba jenjang nung lir asünung, iba asayamung anogo tatemala nung Nagaland-i iba jenjang tanaben agitettsü asü masü ta ajaki rangloka lir. Nagaland ya Gold 31, Silver 22 aser Bronze 28 (ajak senteper medals 81) nguteta lir.

Maneni Assam-ia parnok 33 aser Bronze 32 (ajak aliba metetdakja Gold 29, Silver senteper medals 94) nguteta lir.

3rd NORTH EAST Games 2024		Medal Tally			
Date: 22/03/24		6:30 PM			
		GOLD	SILVER	BRONZE	TOTAL
MANIPUR	32	22	24	78	
NAGALAND	31	22	28	81	
ASSAM	29	33	32	94	
MIZORAM	07	07	08	22	
ARUNACHAL PRADESH	03	08	17	28	
MEGHALAYA	02	06	28	36	
SIKKIM	02	04	13	19	
TRIPURA	01	04	08	13	

Miami Open: Caroline Wozniacki aser Kei Nishikori nunger tsükogo

Miami, Metsüremi/March 22 (Agencies): Alima nung tennis asayar teburtem rongnung taoba mapang number 4 nung alisang Kei Nishikori ya yiruba ajanga mapang talangka tennis asayamung balala nung shilem magiteti arur Miami Open nung shilem agi, saka round mezüngbuba nung Sebastian Ofner-i 6-3, 6-4 agi tsükdaktsü.

Japan nunger Nishikori ya tesüiba küm ana tsüngta tour nung junga masayadang aser tatemsa ATP Tour nung shilem agiba ya July ita Atlanta nung liasü.

Asayamung ayonger temi wildcard agüjaka 2016 Miami finalist ya jenjang 40 buba nung alisang Austria nunger Ofner dang tajungba masayatet.

"Ni junga practice asü sudi ta bilema liasü. Practice mapang ni junga asayatet saka asaya mapang khenyongi balala liasü," ta pai osangbener dang ashi.

"Mopung ona liasü, pai ball nung kanga sashia aser kanga kera azük. Ni kinük leni ball yoktsüla liasü, saka ball tiyong lenisa ao," ta pai ashi.

"Tang atema nükjidong tejangja ka mali, ni asaya aika nung asayaner. Akhi ama

asayatsü atema mapang nung runner-up liasü, saka shiranga Indian Wells nung masayatet.

"Ni iba takok asoshi pelar. Ibai ni asoshi tepelatsü tulu, ni hopta ka dak tema masayatet aser akhi ama asayatettsü mapang agitsü, saka maongka ka anguba atema pelar," ta Rybakina-i ashi.

California asayamung final nung Iga Swiatek-i tsükdaktsüla Greece tsür Maria Sakkari-i Yuan Yue madak 6-2, 6-2 agi takok ngua round tasembuba tongogo.

Arishi küm 25 tain China tsür Yue ya Austin nung WTA singles title mezüngbuba koker Miami yagi aru aser Indian Wells nunga WTA 1000 quarterfinal mezüngbuba tongteta liasü.

2017 French Open champion aser seed toku buba nung alila Jelena Ostapenko-i Germany tsür Laura Siegemund madak 7-6 (7/3), 6-4 agi takok ngua liasü.

Miami Open asemben tashi koka alila Victoria Azarenka-ia America tsür Peyton Stearns den kanga meranga asayar ang 7-5, 3-6, 6-4 agi takok angu. Belarus tsür Azarenka-i Miami nung 2009, 2011 aser 2016 asayamung takok ngua liasü.

Rybakina-i Brisbane aser Abu Dhabi akokba sülen Doha

Khonoma Village nung football penalty shootout tournament ayongzük

Dimapur, Metsüremi/March 22 (TYO): 8 Western Angami A/C indang Village Adoption Committee aser 7 Assam Rifles Sechü-Zubza lungjemer Christian Welfare School, Khonoma nung March 22, 2024 nü Football Penalty Shootout tournament ka ayongzüka liasü.

Lanurtem temesepba chiyongtsü nungi pila alitsü aser academic excellence tsütsüi anitsü nükjidong nung iba asayamung ya "Get High on Grades - Not on Drugs" omen nung ajemdaker ayongzüka liasü.

Iba tournament tenzükdang sentong tatsüka agiba mapang SDO (C) Sechü-Zubza, Athrong ajanga temesepba chiyongtsü nem memesüzükdaktsüi shisaliok nung temulung agütsütsü indang jembia liasü.

Athrong-i iba tournament nung shilem agirtem dang lokti

asoshi tejangja züngsem ka-ka akumtsü aser temesepba mozü anema raraba nung ambassador ama tenzüksü ayongzüka liasü.

Iba tournament nung team 13-i shilem agia pei sempet aser teamwork sayua liasü.

Iba tournament tematiba jenjang Khonoma Students Union-i ngutet aser iba sülen Khonoma Youth Organization "C" aser Baptist Khriesariü Krotho liasü.

Takok angur nem senpet agütsü aser Christian Welfare School nem saisapong balala nung amshiba oset angati agüja liasü.

Kasa mapang Community Hall, Khonoma Village nung Medical Camp ka ayongzüka nüburtem nem healthcare services balala agüja liasü. Iba mapang tebur 91, tetsür 57 aser tanur 50 angati temang repranga mozü agüja liasü.

2026 Commonwealth Games ayongtsü maongka Malaysia-i magizük



Hannah Yeoh

Kuala Lumpur, Metsüremi/March 22 (Agencies): Taruba Commonwealth Games ayongzüksü asoshi Malaysia nem maongka agütsü, saka iba asayamung sentong nung rongsen jenti indokba mechi magizük.

Commonwealth Games Federation ajanga teyari ama sen 100 million pounds (\$126.21m) agütsütsü ashiba yagi iba asayamung meperitsü ta ajitetba sülen sorkari iba telemtetba ya agi, ta Minister of Youth and Sports Hannah Yeoh-i Hokulbarnü ashi.

"Sorkari saisapong terenlok aser nüburtem ajanzükba aser junga alitsü nung ranglokner," ta Yeoh-i sangdong ka nung ashi.

Iba asayamung ayongzüksü asoshi jembishinüba ya Malaysia nung alir ajakibo pela magizük.

Malaysia indang Olympic Council ajanga taoba mapanga iba sentong ya tajemba nung

ayongzüksü jembia liasü.

Iba asayamung nung sen 6.9 billion Australian dollars (\$4.5bn) shi indoktsü ta asadantetba sülen Australia nung aliba Victoria state-i taoba küm atsüngzüka aoba sülen Malaysia dang iba asayamung ayongzüksü asüngdanga liasü.

Victoria indang Auditor-General indang Office ajanga Bodhbarnü osang ka sangdongba nung, iba asayamung ayongba thitsütsüsa rongsen indoktsü asadantetba ya tali-tapong aser shidak masü ta shia liasü.

Iba Commonwealth Games ajanga linük aser territories 70 dak tema nungi saisaponger tem anidener aser parnok ya timba taoba mapang British Empire kübok aliba linüktem lir.

Iba asayamung ketdangsuba tentet ajanga criteria lateta yutsüba metongtetba mechi 2022 küm South Africa indang Durban state nem iba asayamung ayongzüksü temeden agüja aliba agiena UK nung aliba Birmingham nung ayongzüka liasü.

Malaysia ya 1957 küm British nunger dang nungi nüchiso sangdonga liasü aser Kuala Lumpur nung 1998 Commonwealth Games ayongzüka liasü, koba Asian linük nungbo iba asayamung ayongzükba linük mezüngbuba akum.

BILEMDANGANG
"Anogoshi terara merangba ajanga tatem nung takok ajurur."